

Kuangaza kama Mianga Usiku



SABATO MCHANA

Somo la Juma Hili: *Flp. 2:12–30; Rum. 3:23, 24; Rum. 5:8; 2 Tim. 4:6; 1 Kor. 4:17; 2 Tim. 4:21, 13; Lk. 7:2.*

Fungu la Kukariri: “Yatendeni mambo yote pasipo manung’ uniko wala mashindano, mpate kuwa wana wa Mungu wasio na lawama, wala udanganyifu, wasio na ila kati ya kizazi chenye ukaidi, kilichopotoka; ambao kati ya hao mnaonekana kuwa kama mianga katika ulimwengu” (*Wafilipi 2:14, 15*).

Mungu aliwaambia Waebrania kutii kwa sababu utii huo “ndiyo hekima yenu na akili zenu, machoni pa mataifa watakaozisikia amri hizi zote, nao watasema, Hakika taifa hili kubwa ni watu wenye hekima na akili” (*Kum. 4:6*).

Karne nyingi baadaye Yesu alisema, “Mimi ndimi nuru ya ulimwengu, yeye anifuataye hatakwenda gizani kamwe, bali atakuwa na nuru ya uzima” (*Yn. 8:12*). Pia amesema, “Ninyi ni nuru ya ulimwengu. Mji hauwezi kusitirika ukiwa juu ya mlima” (*Mt. 5:14*). Tunawezaje kuwa hiyo nuru? Ni kwa njia ya uhusiano wa karibu na Yesu, “Nuru halisi, amtiaye nuru kila mtu” (*Yn. 1:9*). Kama Wafilipi 2 inavyosema, Mungu “alimwadhimisha mno, akamkirimia Jina lile lipitalo kila jina; ili kwa jina la Yesu kila goti lipigwe... na kila ulimi ukiri ya kuwa Yesu Kristo ni Bwana” (*Flp. 2:9–11*).

Nuru na nguvu za mbinguni zinapatikana kwa ajili ya wote tunaosalimisha maisha yetu kwa Yesu. Lakini mara nyingi sana ama tunamtazamia Mungu afanye yote au mawazo na mipango yetu wenyewe vinakuwa kikwazo. Ndiyo maana maneno ya Paulo kwa Wafilipi yanafaa sana leo.

**Jifunze somo la juma hili kwa maandalizi ya Sabato ya Januari 31.*

Tunatimiza Kile Mungu Anachotenda Ndani

Baada tu ya kumwelezea Yesu kama mfano mkamilifu wa unyenyekevu na utii kwa mapenzi ya Mungu, sasa Paulo anawageukia Wafilipi wenyewe. Anathibitisha utii wao kwa Bwana baada ya kupokea ujumbe wa injili (*Mdo. 16:13–15, 32, 33*) na kuwasilishi waendeleo katika utii huo.

Baada ya kuwasilisha mfano wa maisha ya Kristo na msalaba kama njia ya wokovu, Paulo sasa anajikita moja kwa moja juu ya jinsi haya yote yanavyofanya kazi kwa vitendo.

Soma Wafilipi 2:12, 13. Paulo anamaanisha nini kwa kusema, “Utimizeni wokovu wenu wenyewe”? Unawezaje kuelezea uhusiano kati ya imani na matendo?

Katika aya hizi mbili, Paulo hawasilishi injili tofauti na kile anachoeleza katika Warumi na katika nyaraka zake nyingine. Tunaweza kuwa na uhakika kwamba ujumbe wake hapa unakubaliana na injili ya kuhesabiwa haki kwa imani, ambayo pia alihibiri huko Filipi na maeneo mengine. Lakini pia ni muhimu kuzingatia yote ambayo Biblia inasema juu ya mada husika, hasa juu ya mada ya wokovu, ambayo inaweza kutoeleweka sana.

Soma Warumi 3:23, 24; Warumi 5:8; na Waefeso 2:8–10. Vifungu hivi vinafundisha nini kuhusu wokovu?

Bila shaka, wokovu ni kazi ya Mungu, na sisi wenyewe hatuwezi kujisifu kwa ajili yake. Hata imani yenyewe ni kipawa, kinachohimizwa kupitia kazi ya Roho Mtakatifu. Matendo yetu wenyewe hayawezi kutuokoa; hata hivyo, kupitia kuzaliwa upya, Mungu anatuumba upya kiroho na kutuwezesha kufanya matendo mema. Roho wa Mungu anatenda kazi ndani yetu, akiwezesha nia yetu ya kuchagua mema, kupinga majaribu na kufanya chaguzi sahihi.

Kwa hivyo, tunatimiza kile Mungu anachotenda ndani, “kwa kuogopa na kutetemeka.” (*Fip. 2:12*). Je, hilo linamaanisha kwamba tunapaswa kuogopa hukumu ya Mungu juu ya jitihada zetu ambazo daima ni dhaifu kutii? Bila shaka sivyo. Kirai hiki kinarejelea kuhisi kuwepo kwa Mungu (*tazama Zab. 2:11*) na hitaji letu la kumtii.

Ni kwa njia gani umepata uzoefu wa utendaji wa Kristo ndani yako? Hata hivyo, ni kwa namna gani asili yako iliyoanguka inapingana na kile Mungu anachofanya ndani yako, na unawezaje kuupinga mvuto huo?

Mwanga Katika Ulimwengu wa Giza

Katika Wafilipi 2:14, Paulo anawahimiza Wafilipi “kufanya mambo yote pasipo manung’uniko wala mashindano.” Changamoto za umoja wa kanisa ni kubwa sana kiasi kwamba hauwezi kudumishwa bila juhudi kubwa kwa upande wetu. Umoja ndani ya kanisa ni matokeo ya muungano wetu na Kristo na utii kwa Neno Lake. Ni muhimu kwa ushuhuda wetu, kama Paulo anavyoelezea, akitupatia wito wa “kuonekana kama mianga katika ulimwengu” (*Flp. 2:15*).

Katika usiku wa giza, mbali na mng’ao wa miji na taa za barabarani, nyota nyingi zinaonekana wazi, na zinaonekana kung’aa zaidi. Ni utofauti unaoleta tofauti. Kadiri anga linavyozidi kuwa jeusi, ndivyo nyota zinavyoonekana wazi zaidi. Ndivyo ilivyo kwa ushuhuda wetu. Kadiri giza la kimaadili linavyozidi kutuzunguka, ndivyo kutakuwa na tofauti kubwa kati ya maisha ya wafuasi wa kweli wa Mungu na ya wale wanaojishughulisha na mambo ya kidunia. Basi, ni muhimu kiasi gani kutoruhusu nuru bandia za mawazo, misukumo na desturi za kidunia zifanye ushuhuda wetu upungue thamani au kutoweka kabisa.

Soma Wafilipi 2:15, 16. Paulo anaelezeaje kile ambacho sisi, kama watoto wa Mungu, tunapaswa kuwa na kufanya?

“Mkamilifu” maana yake ni “asiye na makosa, asiye na lawama.” Linatumika hasa kwa Ayubu na tabia yake kamilifu (*tazama Ayu. 1:1, 8, Ayu. 2:3, tazama pia Ayu. 11:4; Ayu. 33:9*). Neno la Kiyunani linalotafsiriwa “si ya kudhuru” kihalisi linamaanisha “isiogushiwa, safi.” Yesu, kwa kuzingatia mashambulizi makali ambayo mashahidi Wake wanaweza kukabiliana nayo, anatutia shime tuwe “wapole kama hua” (*Mt. 10:16*). Vivyo hivyo Paulo anatumia tuwe “wajinga katika mambo mabaya” (*Rum. 16:19*). Vyombo vyetu vya kisasa vya habari havijulikani kwa maudhui safi, yenye kuinua na kuvutia. Katika nyakati kama hizi, desturi ya Daudi ni kanuni muhimu kwetu leo: “Sitaweka mbele ya macho yangu Neno la uovu” (*Zab. 101:3*).

Kamwe hatupaswi kuogopa kuwa tofauti—imani yetu inapaswa kututenga zaidi. Lengo ni “kuonekana kuwa kama mianga katika ulimwengu” (*Flp. 2:15*). Njia pekee ya kufanya hivyo ni kukataa kufuatisha namna ya dunia hii (*Rum. 12:2*) kwa “kulishika neno la uzima” (*Flp. 2:16*). Chaguzi zetu zinaamua ikiwa tumeishi kwa kuitazamia “siku ya Kristo” au “tumeigiza mbio bure” (*Flp. 2:16, linganisha 1 Kor. 9:24–27*).

Ikiwa kuna maeneo ya maisha yako unayoyaona ni “ya kidunia” (na yumkini yapo), unawezaaje kutakaswa nayo?

Dhambi Iliyo Hai

Soma 1 Filipi 2:17; 2 Timotheo 4:6; Warumi 12:1, 2; na 1 Wakorintho 11:1. Paulo anasema nini katika vifungu hivi?

Paulo tayari ameelezea mtazamo kinzani wa kushangaza kuhusu ikiwa ataishi au kufa katika kumtumikia Kristo (*Flp. 1:20–23*). Sasa anapendekeza uwezekano halisi kabisa wa “kumiminwa juu ya dhabihu” (*Flp. 2:17*). Hii tamathali ya semi inatokana na desturi ya kale ya sadaka ya vinywaji, iliyohusisha kumwaga kioevu (kama vile mafuta, divai, au maji) kama sadaka kwa Mungu (*tazama, kwa mfano, Mwa. 35:14, Kut. 29:40, 2 Sam. 23:15–17*). “Upotevu” wa wazi wa kioevu cha thamani kama tendo la ibada unaweza kutukumbusha tendo la Mariamu la kumpaka kichwa na miguu Yesu kwa “marhamu ya nardo safi ya thamani nyingi” (*Mk. 14:3–9, Yn. 12:3*). Wakati ambapo si sadaka ya kinywaji hasa, kwa wazi iliwakilisha dhabihu kubwa sana ambayo ilielezea kwa kufaa dhabihu isiyo na ukomo ya Kristo kwa ajili ya wokovu wetu.

Ikiwa Paulo angeuawa kwa ajili ya kazi yake ya kueneza injili, angefurahi kwa sababu maisha yake yalikuwa “yanamiminwa” kama sadaka kwa Mungu. Kwa sababu sadaka ya vinywaji katika Biblia ya Kiebrania kwa ujumla haisimami peke yake bali inaambatana na sadaka ya kuteketeza (*tazama Hes. 15:1–10, Hes. 28:1–15*), Paulo angechukulia kutoa maisha yake kuwa kikamilisho kinachofaa cha “dhabihu na utumishi/huduma” cha waamini huko Filipi, ambao, kwa njia ya imani, wamechagua kutoa maisha yao kwa Mungu kama “dhabihu iliyo hai” (*Warumi 12:1*).

Wakristo wa awali, pamoja na wale wa Filipi (*Flp. 1:27–29*), walikuwa na bidii katika kushiriki imani yao. Walienda wakienneza injili nyumba kwa nyumba (*Mdo. 5:42*). Walifungua nyumba zao kwa ajili ya kujifunza Maandiko (*Mdo. 12:12; 1 Kor. 16:19; Kol. 4:15; Flm. 1, 2*), na waliweza kutoa sababu kutoka katika Maandiko kuhusu kile walichoamini (*Mdo. 17:11, Mdo. 18:26, 1 Pet. 3:15*). Waasisi wetu Waadventista walifanya vivyo hivyo. Badala ya kutegemea wachungaji kueneza ujumbe kwa majirani zao, walishiriki imani yao, wakatoa mafundisho ya Biblia, na kuwaandaa watu ili wawe tayari kwa ajili ya ubatizo mchungaji atakaporudi.

Kwa ufupi, kwa kujitoa sana binafsi wao wenyewe, yaani, kama “dhabihu iliyo hai,” walifanya kazi ya kueneza injili. Je, hatupaswi kufanya zaidi?

Tafakari juu ya kile ambacho maisha yako yangemaanisha kuwa “dhabihu iliyo hai.” Unajitoa mhanga kiasi gani kwa ajili ya ufalme wa Mungu, na jibu lako linakuambia nini kuhusu wewe mwenyewe?

Sifa Iliyothibitishwa

Wajibu wa Timotheo kama mtumaji mwenza wa waraka huu tayari umetajwa (Flp. 1:1). Sasa Paulo anaanza kueleza kwa undani jinsi Timotheo alivyo wa thamani kama mmoja wa watendakazi wenzake. Anaelezewa kama mwinjilisti (2 Tim. 4:5) ambaye Paulo alikuwa amemtuma Makedonia (1 The. 3:2; linganisha Mdo. 18:5, Mdo. 19:22) na, mara kadhaa, huko Korintho (1 Kor. 4:17, 1 Kor. 16:10). Hapo kwanza alikuwa amefanya kazi pamoja na Paulo na Sila huko Korintho (1 The. 1:1, 2 The. 1:1) na, baadaye, huko Efeso (1 Tim. 1:2, 3; linganisha Mdo. 19:22). Paulo anamweleza Timotheo kama “mwenye nia moja” (Flp. 2:20). Neno la Kiyunani (lit. “sawa katika roho”) linaashiria kwamba alikuwa kama Paulo kwa njia nyingi, ikijumuisha kujitoa kwake kwa Kristo, juhudi zake zenye nguvu za kueneza injili, na kuwajali Wafilipi hasa.

Kwa nini unadhani Paulo anamzungumza Timotheo hapa kwa namna chanya sana na kwa urefu (*tazama Flp. 2:19–23*)? Paulo anasema nini tena kumhusu (*tazama 1 Kor. 4:17, 2 Tim. 1:5*)?

Sifa nyingine ya Timotheo iliyotajwa na Paulo ni “sifa yake” (Flp. 2:22). Neno la Kiyunani linaeleza mtu ambaye amepimwa kabisa kwa majaribu (Rum. 5:4) na ambaye tabia na utumishi wake vimethibitika kuwa vya kweli (2 Kor. 2:9, 2 Kor. 9:13). Paulo anajua hili kuwa kweli kuhusu Timotheo kwa sababu ameona ikidhihirishwa kupitia matukio mengi ambayo walifanya kazi kwa kuambatana katika kuihubiri injili.

Ni uzoefu mgumu wa maisha ambao hujaribu ujasiri wetu na kudhihirisha sisi ni nani kwa ndani. Ellen G. White anasema: “Maisha yanafundisha nidhamu... Kutakuwa na uchokozi ili kupima tabia; na ni kwa kukutana nao katika roho ifaayo ndipo uzuri wa Kikristo unajengwa. Ikiwa majeraha na matusi vinavumiliwa kwa upole, ikiwa maneno ya matusi yanaitikiwa kwa majibu ya upole, na matendo ya kidhalimu kwa wema, huu ni ushahidi kwamba Roho wa Kristo anakaa moyoni.”—Ellen G. White, *Testimonies for the Church*, vol. 5, uk. 344. Anaendelea kusema kwamba ikiwa “taabu na udhia tunavyovipitia” “vinastahimiliwa vema, vinajenga tabia kama ya Kristo na kumtofautisha Mkristo na wale wanaojishughulisha na mambo ya dunia hii.”—*Testimonies for the Church*, vol. 5, uk. 344.

Fikiria kuhusu uchokozi, taabu na kero ambazo umekumbana nazo hivi karibuni. Je, hivi vyote ‘vimevumiliwa kwa upole’ na ‘kustahimiliwa vema’? Unaweza kufanya nini ili kuwezesha uzoefu huu kukusaidia kuwa na nidhamu zaidi?

"Mkawahesabu Watu Kama Huyu Kuwa Watu wa Kuheshimiwa"

Soma Wafilipi 2:25–30. Paulo anamwelezeaje Epafrodito? Ni mitazamo na matendo gani mahususi ya mtendakazi huyu Mkristo vinafunua tabia yake?

Epafrodito anatajwa katika waraka huu tu, lakini tunajifunza mengi juu yake kutokana na kutajwa mara chache kunakoonekana. Kwa kuzingatia jina lake (linalorejelea madhehebu ya Kiafrodito), aliongoa kutoka kwa asili ya kipagani. Kumwita "mtenda kazi pamoja nami" kunaashiria kwamba alikuwa mwenye bidii katika huduma, yumkini akitenda kazi pamoja na Paulo huko Filipi. Kuwa "askari pamoja nami" (*linganisha Flp. 1:27*) pengine kunarejelea mapambano ambayo Epafrodito alikabiliwa nayo katika kuhubiri injili, akiwa tayari hata kuhatarisha maisha yake (*Flp. 2:30*).

Kama "mjumbe" (Kiyunani, apostolos) aliyeteuliwa na kanisa la Filipi, Epafrodito anatumwa kumhudumia Paulo gerezani na kushughulikia mahitaji mengine yoyote anayoweza kuwa nayo (*Flp. 2:25*). Yeye ndiye Wafilipi walimkabidhi zawadi zao za kifedha kwa ajili ya Paulo (*Wafilipi 4:18*). Sadaka hizi zilikuwa muhimu sana kwa sababu chakula chochote, mavazi, matandiko, au mahitaji mengine ambayo wafungwa wa Kirumi wangehitaji yangepaswa kununuliwa kwa gharama zao wenyewe au kuletewa na familia na marafiki (*linganisha Mdo. 24:23*). Karibu na mwisho wa kifungo chake cha pili huko Rumi, Paulo alimwomba Timotheo "jitahidi kuja kabla ya wakati wa baridi" na "Lile joho nililoliacha kwa Karpo huko Troa, ujapo ulilete" (*2 Tim. 4:21, 13*). Inavyoonekana Paulo angelihitaji koti hili nene la sufu katika seli yake ya mawe yenye baridi. Pia alikuwa Epafrodito ambaye alikabidhiwa kupeleka waraka huu huko Filipi (*tazama Ellen G. White, Matendo ya Mitume, uk. 479*).

Yumkini kwa sababu ya matatizo huko Filipi (*tazama Somo la 4*), Paulo "alifanya bidii nyingi" kumtuma Epafrodito haraka kuliko ilivyotazamiwa, na hivyo anawahimiza Wafilipi "mpokeeni, basi, katika Bwana, kwa furaha yote" (*Flp. 2:29*). Paulo anataka kuhakikisha kwamba hawawi na wasiwasi juu ya hali yake huko gerezani. Pia anasisitiza kwamba Epafrodito ndiye aina ya mtu ambaye Wakristo wanapaswa kumheshimu sana, si kwa sababu ya mali zao au hadhi yao ya kijamii bali kwa sababu ya roho yao ya kujitoa katika kufuata mfano wa Yesu (*Flp. 2:6–11, 29, 30; linganisha Lk. 22:25–27*). Neno la Kiyunani linalomaanisha heshima linaonekana mara chache tu katika Agano Jipya: kwa msumishi wa akida "aliyempenda sana" (Lk. 7:2), kwa wale wanaooneshwa heshimu kwa sehemu yao ya kukaa katika karamu (Lk. 14:8), na kuhusu Yesu kama jiwe la pembeni "lenye heshima" (1 Pet. 2:4, 6). Ili Epafrodito ajumuishwe katika kundi hilo, kwa kweli, ni lazima awe alikuwa, mtu mwaminifu.

Jifunze Zaidi:

“Yeye anayesimama karibu sana na Kristo ndiye atakuwa yule aliyekunywa sana duniani roho ya upendo Wake wa kujitoa kafara,—upendo ambao “hautakabari, haujivuni;... hautafuti mambo yake; hauoni uchungu; hauhesabu mabaya,” (1 Wakorintho 13:4, 5),—upendo unaowavuta mitume kama ulivyomvuta Bwana wetu, kutoa vyote, na kuishi na kufanya kazi na kutoa kafara, hata mauti, kwa ajili ya kuwaokoa wanadamu. Roho hii ilidhihirika katika maisha ya Paulo. Alisema, “kwa maana kwangu mimi kuishi ni Kristo,” kwa maana maisha yake yalimdhahirisha Kristo kwa watu; “na kufa ni faida,”—faida kwa Kristo; kifo peke yake kingedhihirisha nguvu ya neema Yake, na kuwaleta watu Kwake. “Kristo ataadhimishwa katika mwili wangu; ikiwa kwa maisha yangu, au ikiwa kwa mauti yangu.” Wafilipi 1:21, 20.”—Ellen G. White, *Tumaini la Vizazi Vyote*, Schemu ya Pili, uk. 156, 157.

“Wakati si mbali sana ambapo kila nafsi itajaribiwa. Alama ya mnyama italazimishwa juu yetu. Wale ambao wamekubali matakwa ya ulimwengu hatua kwa hatua na kupatana na desturi za ulimwengu halitakuwa jambo gumu kwao kujisalimisha kwa wenye mamlaka, badala ya kujitisha kwa dhahaka, matusi, kutishiwa kutiwa gerezeni na kifo. . . .

“Wakati wengi wa ndugu wa uongo watakapojitenga na walio wa kweli, ndipo waliofichwa watakapoonekana wazi, na wakiimba hosana chini ya bendera ya Kristo. Wale ambao wamekuwa waoga na wasiojiamini watajitangaza waziwazi kwa ajili ya Kristo na kweli Yake. Wale walio dhaifu zaidi na wanaositasita ndani ya kanisa watakuwa kama Daudi—tayari kufanya na kuthubutu. Kadiri giza linavyozidi kuwa nene kwa watu wa Mungu, ndivyo nyota zinavyozidi kung’aa. Shetani atawashambulia sana wale walio waaminifu; lakini, katika jina la Yesu, watatoka wakiwa zaidi ya washindi.”—Ellen G. White, *Testimonies for the Church*, vol. 5, uk. 81, 82.

Maswali ya Kujadili:

① Fikiria juu ya onyo katika nukuu hapo juu kuhusu “Wale ambao wamekubali matakwa ya ulimwengu hatua kwa hatua na kupatana na desturi za ulimwengu.” Hilo linaweza kujumuisha nini? Jadili jinsi hili linavyoweza kutumika si tu kwa mtu mmoja mmoja bali kwa kanisa kwa ujumla.

② Mungu anasema, “‘Wanaoniheshimu nitawaheshimu’ ” (1 Sam. 2:30). Tunamheshimu Mungu kwa njia zipi? Je, ni sawa na “kumtukuza” (Ufu. 14:7)? Kwa nini au kwa nini sivyo?

③ Tunawezaje kuelewa dhana ya kuutimiza wokovu wetu wenyewe pasipo kuanguka katika mtego wa kuwa washupavu wa sheria?